

**■ COLUMNA**

# Epifania ... e las festas van anora

DAD AUGUSTIN MANETSCH

Cun Nadal è quai in pau sco cun il Tour de Suisse. Là persequiteschan ins da la entschatta davent co quel sa sviluppa e spetga cun brama il di ch'ils ciclists arrivin finalmain en la atgna regiun. Cura che quai di arriva semettan ins ad uras sper via per gea munchentar nagut. Il peloton vegn annunzià cuntinuadamein e per divertiment passan ils autos da reclama. Tuttenua fa i wuumm, ils pedalur passan en in dai speravia, e tut è gia finì. In pau uschia è quai pia cun Nadal. Tuttina spetgan ins onn per onn vess sin el. E tgi vules in onn senza Nadal? Ins astga dentant betg spitgar memia bler da quella festa. Bleras sairas dals 24, la vigelgia da la festa da Nadal, fan naufragi, perquai che mintgin patratga che quella saira dastgia betg esser ina saira normala, era sch'ins baratta regals e gianda past e bavrondas da festa. Tut stoppia esser spezial, festiv e steril e nagut spontan.

Ina saira da vigelgia Nadal che jau emblidel mai, hai jau astgà «festivar» en la claustra da Müstair. Mo il pader «Schaffer» ed jau. (Schaffer numnan ils da Müstair il pader benedictin da Mustér che è spiritual ed administratur a Müstair.) Las mungias durmevan gia en sontg ruaus. P. Maurus Angehrn ed jau eran allerta e spetgavan sin la messa da mesanotg. Qua manegia il pader che nus savesian metter en funcziun il magnetofon che Frau Theresia haja survegnì sin Nadal. (Certas mungias ve-



gnivan tituladas cun «Frau», autras cun «sora».) Frau Theresia era scolasta ed aveva dumandà nus per quel servetsch. Per spass avain nus lu prendì la descripciun co igl apparat haja da vegnir mess en funcziun e suandà punct per punct e construcziun per construcziun quel. Ed i ha funcziunà. Cun far in pau igl asen è quai stà insacura las indesch. Ils zenns han entschavì a tucar. Lu ha il pader ditg ch'el stoppia ir a sa preparar per il servetsch divin. Jau sappia anc magliar e baiver insatge e lu ir a letg u vegnir a messa da mesanotg.

## Al marcau ed al mund

Da quel temp deva i anc betg televisiun en las pli bleras da nossas 150 valladas, mo pauc pli tard è ella vegnida rapid. Dapi lu datti in ulteriur punct fix da Nadal. La benedicziun urbi et orbi il di da Nadal a las dudesch. Ella è bella ed impressiuanta, il messadi da Nadal zuglià en ina nundetga prestaziun coreografica e tecnica. Mo il papa Woitila vegn onn per onn pli caduc. Ins capescha gnanc pli el, egal en tge linguatg

ch'el discorra, ed ins exclamass gugent cun il cantatur medieval Walther von der Vogelweide (1170 – ca.1233), barattond «junc» cun «kranc».

*O wê, der babest ist ze kranc. Hilf, herre, deiner Kristenheit.*

Dumondan ins persuenas che duessan savoir sche quai stoppia esser il papa e sulet il papa che sappia transmitter onn per onn la preziosa nuviala a la citad ed al mund, sche survegnan ins la resposta: «Quai chapis vus betg.» Vegn schon a constar!

## Las festas van anora

Epifania che era pli baud tar nus firà, era la davosa festa da quella retscha. Quel di era reservà per visetas tar ils parents en auters vitgs. Il di suenter Epifania vegneva il pigniel fatgs giu sco segn exteriur che las festivitads sajan uss definitivamein a fin. Oz svanisch las decoraziuns vid las chasas e las illuminaziuns da las vias. Ils luvendis entschevevan. Mo ils dis creschan. Era anc ozendi. Gia vai encunter Son Bistgaun e Sontga Gada, omadus dis ch'ins fa stem co ils dis èn creschids. Ils Bergagliots dian: «Al di da S. Agäda, al sul va per tutt la contrada.» e Toni Halter numna sontga Gada «per aschi da dir l'emprima irundella da l'onn nov, (...) era sch'igl è aunc ault enviern». Ed ina outra experientscha relata: «Sontga Gada, mes'envernada». – Las festas van anora ed igl onn anen ed ensi cun adina puspè in di spezial che stat sco in bel paracar sper via. Cuntinuai bain.